

## UN SPROPOSIT... MERETÀ!

La int ch'e je a stâ pôc di ca o pôc di là dal gnûf cunfin tra il stât talian e chel sclâf, si lemente a fuart da l'assurditât di chest cunfin; e la stampe di cà e di là 'e ten bordon, publicant dibot ogni dì qualchi maludizion cuintri di chêi che lu àn segnât. Nancje di dîlu, chêi di là a' sberghèlin parcè che la rie blancje no je plui in cà, e chêi di cà a' ronin parcè che no je plui in là. I resonamenz che fasin a' son juste chêi istes, chel istes il lengaz, chê istesse la smare: nome che la direzion 'e je contrarie. No si è mai viodude, salacôr, une cuncuardie cussì nete tal criticâ une cjose e une contrarietà cussì raibiôse tal proponi i rimiedis.

E alore si scuèn propri dî che, almancul indulà che van in cunvigne, a' devin vê reson. Il cunfin stabilît dai aleâz, ch'al ven a jessi in sostanzie, la "linie francese" al è pardabon il sproposit plui madornâl che si podeve fa. Ma al è ancje vêr ch'al rapresente l'uniche soluzion pussibil in conformitât al spirt nazionalistic des popolazions. Quan'che la famose Cumission internazionâl si è presentade in chêi paîs a palpâ il pols de int, l'uniche musiche che faseve un sunsûr dal cjadaldiaul, 'e iere chê etniche-nazionaliste: nissun sclâf oleve resta sot da l'Italie, nissun talian sot de Jugoslavie.

Un patriotisim, tant di une bande che di cheâltre, di gjavâ lis lagrimis da vôi! Un patriotisim cussì disinteressât e gjenerôs che nol dave nissun pês es volgaritâz dal calcul economic, e al cjalave nome al ideâl! E un calôr tal odeâsi une razze cun cheâltre, che nissun podeve pensâ di fâlis vivi ancjemò insieme. La Cumission, par tant ch'al pâr, no veve nissune reson di favorî une nazion plui di cheâltre: e alore 'e à fat, un tai secont lis aspirazions patriotichis des majoranzis etnichis. Ce vevie di fâ. Lassâ Gurize ai sclâs? Lassâ i sclâs dal Cjars sot i talians, une volte che mostravin di odeâsi tan'che madracs?

Cumò nè chêi di cà, nè chêi di là no puedin vivi: cumò l'ideâl nazionalistic nol baste a implenâur il budiel, e l'esigjenze economiche 'e scomenze a fasi sintî. E alore il cunfin al è diventât un sacrilegio: nome cumò! Ma nol è di dî che si ricròdin: tant chêi di cà come chêi di là a' mantegnin lis lôr pusizions nazionalistichis e a' pratîndin un spostament ognidun in sô favôr, cul pinsîr segret di regolâ lis cuestis a chêi da l'altre razze, apene rivâz a vê la paronanze. E al è dibant pridikjâ che une cjose di cheste fate no podarâ mai jessi permetude da un istitût internazionâl e imparziâl, parcè che al sares cuintri ogni norme di justizie. (Magari la justizie 'e je une cjose e la pulitiche un'altre!).

L'uniche soluzion resonade e clare come l'aghe, par une region indulà che dôs razzis a' vivin messedadis in chê maniere, 'e sares stade chê di creâ un organisim a largje autonomie, di madâ fûr dai pîs i fanatics, di une bande e di cheâltre, che rîndin impossibil la convivenze, di favorî cun duc' i miez l'intese e la colaborazion dai doi elemenz etnics cuintri ogni rumi nazionalistic. Ma i sclâs

no uelin distacâsi nancje un fregul dal lôr mont, e i talians a' uelin jessi i plui vizzins al cûr de Grande Mari... E alore parcè lamentasi di une situazion che si son create di bessoi e che fasin di dut par fâle durâ?

Che zighin "Viva" di cà o "Zivio" di là e che strènzin la cinturie.

Patrie dal Friûl, n. 5, 1/15 di Marz 1950